

## ‘ASOBIYAH POSITIF ATAU ‘ESPRIT DE CORP

Bismillahirrahmanirrahim

Perbincangan yang memberi fokus khusus kepada hal ehwal bangsa sering dikaitkan dengan sikap ‘asobiyah. Ini berikutan wujud golongan yang mengaitkan perkara cinta dan kecenderungan menyantuni hal ehwal bangsa sendiri sebagai suatu perkara yang ditegah oleh ajaran agama Islam, kerana menganggap hal ini termasuk dalam ciri ‘asobiyah.

Salah tanggapan ini telah mencetuskan sikap prejudis serta negatif apabila dihadapkan dengan perbincangan terkait hal-hal bangsa, malahan tidak kurang yang memprotes dengan kata-kata seperti: “*tidak cukupkah Islam untuk menyelesaikan masalah ummah*”, “*kita tidak perlukan bangsa, Islam sahaja sudah cukup bagi kita*”, “*cintakan bangsa adalah sikap ‘asobiyah yang diharamkan dalam agama kita*”, atau yang seumpamanya! Sesungguhnya, ungkapan-ungkapan seperti ini merujuk pada keketatan ilmu atau kesalah fahaman dalam memahami konsep ‘asobiyah itu sendiri.

Bertanya seorang lelaki kepada Rasulullah s.a.w : “*Adakah perbuatan ‘asobiyah seseorang itu suka (kasih) kepada kaumnya? Tidak, tetapi ‘asobiyah itu ialah orang yang menyokong (menolong) kaumnya melakukan kezaliman.*” (HR An-Nasai’)

Dalam hadith di atas, Rasulullah s.a.w sendiri telah memberikan penerangan yang jelas dan tuntas bahawa sifat cintakan kaum dan bangsa bukan termasuk dalam perkara ‘asobiyah. Ianya menjadi ‘asobiyah hanya apabila mencetuskan sikap ketaksuban terhadap kaum atau bangsa, memandang bahawa kaumnya itu betul belaka sehingga sanggup melindungi, mempertahankan malah bersekongkol dalam melakukan kesalahan-kesalahan dan kejelekan-kejelekan yang dilakukan oleh ‘ahli keluarga bangsanya’, sekaligus memandang rendah, menghina, mencela apatah lagi menzalimi kaum atau bangsa lain. Ini merupakan suatu sikap yang melampau atau ekstrim, dan inilah yang ditegah dalam ajaran agama Islam.

Sedangkan perasaan cinta dan kecenderungan terhadap bangsa sendiri tanpa bersikap ekstrim, bolehlah diumpamakan sebagai ‘asobiyah positif, atau *esprit de corp* atau semangat kekitaan, merupakan sesuatu yang bersifat fitrah, justeru yang mencipta kabilah, kaum dan bangsa itu adalah Allah s.w.t sendiri!

Allah s.w.t berfirman yang mafhumnya:

“*Wahai umat manusia! Sesungguhnya Kami telah menciptakan kamu dari lelaki dan perempuan dan Kami telah menjadikan kamu berbagai bangsa dan bersuku puak, supaya kamu berkenal-kenalan.*” (al Hujurat: 13)

Dalam ayat yang lain, Allah s.w.t berfirman yang mafhumnya:

“*Dan di antara tanda-tanda yang membuktikan kekuasaanNya dan kebijaksanaanNya ialah kejadian langit dan bumi dan perbezaan bahasa kamu dan*

*warna kulit kamu. Sesungguhnya yang demikian itu mengandung keterangan-keterangan bagi orang-orang yang berpengetahuan". (ar Rum: 22)*

Sesungguhnya jika Allah s.w.t menghendaki, maka sudah tentu diciptakanNya umat manusia keseluruhannya sebagai satu bangsa, warna kulit dan bercakap dalam bahasa yang serupa. Namun itu bukan kehendakNya, Allah s.w.t yang Maha Indah, Maha Berkuasa lagi Maha Sempurna, ingin memantulkan sifat Jamal dan JalalNya dalam ciptaanNya yang bergelar insan, maka diciptakan manusia yang pelbagai rupa paras, warna kulit dan ciri-ciri yang berbeza sebagai fitrah berbangsa.

Dalam mukadimah Ibnu Khaldun, dijelaskan makna yang tersirat pada lafaz 'asobiyah (positif), iaitu fitrah rasa 'kekitaan' atau '*esprit de corp*, yang wujud hasil dari perkongsian latarbelakang serta perkembangan sejarah, budaya, pegangan dan amalan yang sama dalam satu keluarga, kerabat, kaum atau bangsa. Contoh yang paling mudah, perkembangan sesebuah keluarga adalah disemai, dibaja dan disuburi dengan latarbelakang didikan, agama, nilai, adat resam, kejiwaan, hasrat dan wawasan suami isteri sebagai pasangan induk yang membentuk, mencorak, mewarnai dan meletakkan hala tuju keluarganya itu. Ianya mengidentikan dan memberi keunikan setiap unit keluarga yang tidak boleh difahami secara mutlak oleh keluarga-keluarga yang lain, sehingga mewujudkan FITRAH RASA KEKITAAN.

Bolehkah kita samakan keluarga kita dengan keluarga orang lain? Bolehkah kita menghalusi, memahami dan memberikan tafsiran yang tepat dan sama tentang adat kelaziman, undang-undang, amalan, nilai, norma, kepercayaan, persepsi, rahsia yang tersurat dan tersirat yang wujud dalam keluarga-keluarga lain sebagaimana keluarga kita?

Bayangkan bagaimana seorang Melayu cuba mentafsir epik Ramayana? Bagaimana seorang Jerman cuba menggarap kisah-kisah dalam karya klasik Sejarah Melayu, menyelami konsep daulat, derhaka, amuk, tulah? Bagaimana seorang China cuba menghayati prinsip pengorbanan Kamikaze yang unik kepada masyarakat Jepun? Bagaimana seorang Inggeris mampu menjiwai resam kaum Tibet di pergunungan Himalaya atau kepercayaan kaum Zulu di pendalaman Afrika?

Bolehkah kita memahami keluarga orang lain sebagaimana kita memahami keluarga kita, mungkin boleh, namun ianya akan mengambil masa yang panjang hatta perlu terjun dan tenggelam dalam dunia mereka, menghayati akal pemikiran, falsafah, prinsip, kejiwaan, kepercayaan dan spiritual mereka yang diterjemah dalam pelbagai sisi kehidupan. Mudah??

Sesungguhnya, fitrah rasa kekitaan di kalangan ahli keluarga, kaum atau bangsa mempunyai fungsi penting dalam kehidupan bermasyarakat demi mewujudkan suasana kasih sayang, aman damai, keharmonian serta sikap saling bantu-membantu dalam semangat kekeluargaan demi memelihara kepentingan-kepentingan yang dikongsi bersama, termasuk tonggak-tonggak fundamental demi mempertahankan serta melestarikan kekuasaan sesuatu bangsa. Perkara ini dapat dibuktikan oleh Sirah Nabawiyah dalam sejarah Negara Madinah.

Maka apakah hikmah yang wujud di sebalik fitrah berbangsa itu?

Bersambung...